



Abimelech osta la femme à Abraham, dont Dieu le menasse de mort, puis il la luy rend, & le prie d'habiter en son pays.

ABRAM s'en alla de là en la terre de Midy, & demeura entre Cadéz & Sur, pour estre estranger en Geraris, & disoit sa femme estre sa sœur. Abimelech Roy de Geraris luy prit sa femme Sara : Mais Dieu vint à Abimelech de nuict par songe, luy disant ; Tu mourras à cause de la femme que tu as prise, car elle a vn mary. Or Abimelech ne s'estoit point approché d'elle ; lequel répondit, Seigneur, occiras-tu ainsi la gent iuste ? N'a t'il pas dit c'est ma sœur ? Et elle m'a dit, c'est mon frere. Et Dieu dit par songe, Je connois que tu as fait cela en simplicité de ton cœur. C'est pourquoy ie n'ay point permis que tu la touchasses ; rends la femme à cét homme, & il priera pour toy. Adonc Abimelech appella Abraham. Et apres luy auoir remontré le danger auquel il auoit esté, pour l'offense par luy faite, luy donna des brebis de toute espece, avec des seruiteurs & seruantes : & luy restitua Sara sa femme, le priant de prendre habitation en son pais. Or le Seigneur visitant Sara, selon sa promesse, elle conceut & enfanta à Abraham lors âgé de cent ans, son fils Isaac, qu'il circoncit au huitième iour. Lors Sara dit en s'esioüissant, mais qui eust dit à Abraham, Sara allaictera vn enfant ? & toutesfois i'ay enfanté vn enfant en ma vieillesse.

Genese 20. & 21. Chap.